

欽定大清會典事例

欽定大清會典事例卷三百八十五

禮部

學校

副榜事宜

歲貢事宜

優貢優監事

貢例監事宜

恩監事宜

軍功貢

監事宜

例

副榜事宜。○順治二年定。順天府鄉試副榜五十五名。增附准作貢監廩生及恩拔歲貢貢監俱免其坐監。即與

廷試。○五年。欽奉

恩詔。直省鄉試副榜諸生。廩監准貢。增附准入監肄業。○十一年議准。副榜貢生。亦於四月十五日

廷試。照例公閱。止序卷次先後。不定職銜。將恩拔副榜貢生。及歲貢生願入監肄業者。一併送監。依期坐監。吏部會同內院禮部公考。以定職銜。○又議准。直省鄉試副榜。各送監肄業。內廩生副榜。照恩拔貢生例。坐監六月。增附生副榜。照歲貢例。坐監八月。永為定例。○康熙元年題准。停止鄉試副榜貢額。○十一年議准。直省鄉試。每正榜中額五名。設副榜中額一名。○又議准。直省鄉試。仍取副榜。作貢生送監。其廷試停止。○雍正四年

論近來試官多以四書文為主。而於經藝不甚留心。士子讀書制行之道。首在明經。其以五經取中副榜者。必係有志經學之士。著將今年各省五經取中副榜之人。俱准作舉人一體會試。再今科各省所中副榜內有兩次中副榜者。亦准作舉人一體會試。以上俱係特恩。後不為例。○乾隆二十年覆准。各省廣額。仍遵定例。並不加中副榜。○三十三年覆准。順天鄉試。分別滿合南皿北皿北貝等字號。覈計各號正榜之數。照每舉人五名副榜一名之例取中。以歸畫一。各號奇零。照不足五名之例。毋庸

覈算取中。○四十八年定。是科中皿中式正榜九名。照五正一副之例。取中副榜一名。○光緒元年奏准。陝甘分闈鄉試。該二省副榜。陝西照定額四十一名覈算。甘肅照定額三十名覈算。每舉人五名取中一名。捐輸及

恩詔廣額。照例不准覈算。○五年覆准。順天鄉試夾字號。原額四名。向無副榜。今加中四名。取中副榜一名。貝字號中額。並旦字號。原一百六名。今仍復旦字號。另行取中四名。貝字號覈減副榜一名。

歲貢事宜。○順治二年題准。直省起送貢生。府學每年一人。州學三年二人。縣學二年一人。各省學政將印結單卷。由布政使司起送。直隸學政由各府起送。黏連府州縣學印結。各單內均用印鈐蓋。該學政仍將貢生姓名造冊送部。○又題准。貢生

廷試。以三月十五日。吏禮二部官同翰林院官赴內院。公同閱卷定序。○三年題准。直省歲貢生於每年四月十五日

廷試。該學臣照例考定。給單起送。限三月內到部。

如過期者。俟次年補試。○四年題准。學政每歲將次年應貢生員。屢經科舉者三人。一正二陪。詳加考選。如正貢年已衰老。文理荒疏。令其告老。取陪貢充選。再不得人。更取其次陪貢。務於挨序中。仍寓遴才之意。其有停廩降廩科歲。考居三等者。亦許收復。未收復者。不許起送。其應貢者。定限次年三月到部。如有濫充。即發回原學。五名以上。學政照例罰俸。○又議准。由部會同內院。將現在貢監生。嚴加考試。除選取存監外。其餘革去貢監。發回原學。分別照廩增附肆

業。及行學黜名有差。○又頒起送貢生

廷試單文新式。通行直省提學。○八年題准。

廷試貢生。由部會同內院吏部。於四月十五日起
天安門外橋南行禮。考試畢。會同閱卷立序。送吏
部出榜。其考試人數。當日奏

聞。○九年題准。本年已考正貢。遇有事故出缺。係人
文未經到部。在一年以內者。將原給批咨硃卷
追繳。挨次取年力強壯文學優長者一人補貢。
定限於應貢年分次年到部。方准收考。如將年
遠貢缺濫補市恩者。起送到部。即將本生發回。

革廩肄業。學政叅究。又題准。歲貢正陪。務以
屢經科舉者。仍以食餼年深為序。同補則以原
考案為序。除停廩未復者。緣事住食廩餼者。服
闋及告病給假過限不補考者。服滿未補而緣
事者。停降未復而丁憂者。皆扣算作曠外。其餘
概不作曠。停降考復緣事辯復者。以文到日為
始。准作實廩。降增而復補廩者。准前後通算。就
中較其食餼。以年月最深者為正貢。其次以是
為差。每遇考期文到。提調官即取教官廩生里
鄰合例甘結。備造年貌籍貫科舉次數起送考

選。如值出巡。遇便投考。考取領文日。即開廩作缺。若已領硃卷。而丁憂患病者。仍作正貢。如一年內人丈未到部。而病故。或黜革者。有司將原領卷單追繳。別送考選。如領過盤費。黜革者。追病故者。免。若於考後衰老荒疏。不堪充貢者。同致仕例。不補貢。內有捏增科舉。隱匿停降。及受賄讓貢。並爭貢者。黜革。起送官吏。一併查究。十一年題准。直省考貢。限一日內。考經書策論四篇。務取明通淹貫之士。照題定科場解卷限期。將原卷印封。解部磨勘。不許轉發。謄紅。以致

改竄文字。卷有荒謬者。由部會同禮科指叅。○十五年題准。歲貢生於部內過堂時。詳看年力強壯者。方准送監。○十六年題准。

廷試貢生試卷。用翰林院印。御史二人分東西班監試。兵部撥步軍兵丁赴

長安左右門看守。工部鋪設考官坐案。光祿寺備執事官飯十席。並貢生供給。鴻臚寺官於

天安門外引禮。鑒儀衛撥校尉赴考處按檢看守。北城兵馬司備官版四書五經綱鑑

大清律送部應用。均由部咨劄行取。○康熙元年題

准。貴州雲南貢生暫免。

廷試。貴州咨送吏部。就近改補教職。雲南咨行該撫。就近考試。將試卷封送吏部。校閱定銜序選。
○又題准。歲貢一項。酌量裁減。府學三年出貢二名。州學二年出貢一名。縣學三年出貢一名。
○八年議准。歲貢仍令府學一年一貢。州學三年二貢。縣學二年一貢。○二十三年議准。雲南貴州省歲貢生。暫就本省考試。試卷解送禮部。閱定次序。移咨吏部。其願就廷試者聽。○又覆准。直省歲貢。概免來京。

廷試著各學政挨序考准。咨部補授訓導。捐納歲貢。亦聽驗看考送。願入監肄業者。學政給文咨部劄監。○三十六年題准。各省歲貢。願入監者。停止學政起送之例。由本州縣給文。到監肄業。○雍正六年議准。寄籍廩生改歸原籍者。俱改為候廩。與原籍諸生照考案先後挨次新舊間補。較其食餼年分。挨次出貢。○乾隆三年議准。廩生考取歲貢。給有貢單。未經報部身故者。冊內聲明達部。准作貢生。其本年歲貢。陪貢頂補。所有旗扁銀。留給頂補之生。○三十一年議准。

各省歲貢赴監肄業。例由地方官取結申送。當
驗其精力未衰。方能振作。衰邁者不得濫送。
四十年奏准。嗣後順天各屬考貢諸生。距考棚
在五百里以內者。以十月為限。其在五百里以
外者。以一年為限。如逾限不行投考。即將該生
應貢之處永行扣除。不得再行補考。其赴考以
前。有實在患病事故者。由該教官具結報明。暫
行展限。仍限令三月內將補考緣由。於冊內聲
明報部。以憑查覈。四十一年奏准。嗣後廩生
出貢。各該學政於考准之日。當堂填給貢單。令

其收執。其赴監肄業者。仍取本籍地方官文結。並親齎貢單投驗。儻無單呈驗。除駁回外。將遺漏給單之該學政。叅處。至現在肄業及續來之歲貢生。內有出貢在乾隆四十年以前。未經給有貢單者。由國子監覈驗本籍文結。再咨查禮部。俟部覆後。貢冊有名。仍准其肄業。報滿咨部銓選。毋庸補給貢單。以歸簡易。○四十二年議准。嗣後廩生內有詞訟牽連。經地方官審明。申詳督撫發學戒飭者。即將該生出貢之處扣除註冊。仍將原案呈報禮部查覈。○又議准。鄉試

年分。各省歲貢等。有情願赴國子監肄業者。遵照定例。由地方官驗看確實。出具文結。徑送國子監辦理。毋庸由部轉送。○四十三年覆准。廩生緣事斥革。准其捐復人員。年滿考充正貢。應於捐復後補實廩之日扣起。其從前食廩年月。毋庸接算。○四十五年覆准。年衰文謬之廩生。當出貢之時。即將廩生出缺。不得仍令該生虛糜廩餼。至曾經犯案。不准出貢之廩生。較之年衰文謬者。其情節較重。當該生應貢之時。既已扣除出貢。自應將廩生照例一併出缺。令以虛

廩應試。仍不得曠廢學課。以示勸懲。○五十年
覆准。嗣後考貢。概令毋須遠出。歲科兩試。各就
本棚投考。除本年輪貢者無論外。其有下年始
輪應貢而計下年案臨不復至者。准其豫考。有
本年應貢而計本年案臨不及者。准俟下年補
考。給發貢照時。仍按應貢本年填註報部。惟查
學政案臨一屬。不過弔月。該生等難保無患病
事故。致誤本棚考試。仍准其隨棚投考。以示體
恤。但須明立限期。無論豫考補考。均以學政案
臨之期定限一年。令其就便隨棚投考。違者不

准出貢。其廩缺一併開除。仍將次貢考補。並於冊內聲明緣由報部。以憑查覈。○又覆准。嗣後廩生除行止不端。恃符滋事者。照例斥革外。若所犯本輕。為人波累。既經戒飭。即已結案。其挨充歲貢之時。照舊例一體考充。○嘉慶五年議准。嗣後凡有應正貢之生。遇有丁憂事故。無論學政案臨先後。總以應正貢之生。在應貢本年扣至年底。可以服闋者。概准補考。仍以服闋之日。按照定例。計限一年以內。隨棚補考。不得以陪貢送試。致滋撓越。如值應貢之年。而該正貢

生扣至下年始能服闋者。亦未便懸缺待人。無論學政案臨何處。均以其次應貢之人送試。十六年議准。軍功議敘銓選之廩生。有情願註銷銓選者。准其註銷。仍留原銜頂戴。收入學冊。作為候廩。仍扣去從前開除學冊日期。於收補廩缺後。與在學諸生挨次出貢。二十年議准。嗣後廩生以軍功議敘。情願註銷銓選者。照各項虛廩之例。挨年序貢。以歸畫一。毋庸照十六年議准成案辦理。二十四年覆准。應貢各生。如有任意延宕。並非患病事故者。即照補考逾

限例。不准出貢。其廩缺一併開除。仍將次貢考補。其實係患病事故。於一年之內。隨棚補考者。仍於考准後再行開缺頂補。以免攙越。○道光二年奉

旨。江蘇學政姚文田。於應考貢生。遲至數年之久。尚未考齊。實屬違例遲延。姚文田著交部議處。所有嘉慶二十四五等年。已經考准各貢。著該學政先行造冊送部。並將未經考齊各貢。照例辦理。毋再遲延。○三年奏准。嗣後歲貢生到監肄業。八旗取本旗文。直省取本籍文。並准其取具同鄉六品以上京

官印結以歸畫一。○四年議准。嗣後各省。每歲應貢之學。照例考取。統於考後本年封印前。造冊送部。其有逾期一月不行出咨者。即將該學政指叅。交部嚴加議處。至貢生考取後身故。未經報部者。照例准其另行考補。由學政專咨報部。將身故年月。考補年月。詳細聲明。以備查覈。如有例限之外。即不准再行考補。有違例考補者。將該學政及送考教官叅處。該生仍行斥革。○二十一年覆准。各省新設學校。有原附他學。現經撥歸之廩生。准其接算從前食餼年分。並

照前學換貢年分出貢。○咸豐六年奏准。廩增
附考取教習。復在大器營報捐。作為歲貢生。即
照正途出身。准其報捐內閣中書。國子監學正
學錄。並准其捐正印等官。毋庸捐免保舉。○同
治五年奏准。歲貢一途。非考取前列。積數年之
資。不能揆出。今捐輸准作歲貢。則挾資二百餘
兩。即與皓首窮經之士。同列成均。於勸學作人
之道。均屬未宜。且於考取教習後。准其補捐歲
貢。作為正途。尤易取巧。現當增修捐例之時。應
將大器營章程內。由廩增附報捐歲貢生銀數。

三條。即行刪去。停止報捐。○光緒二年

諭。據御史林拱樞奏。福建各學。例應出貢之廩生。延不肯出。致有託貢名目。其應行補廩各生。因挨補無期。竟有賄買廩生。捏稱移籍。以為騰缺坐補之地。請飭嚴禁等語。各學出貢補廩。本有定章。豈容行賄舞弊。著福建學政查明。遇有廩生例應出貢者。立限催令出學。不准延宕。其呈請移籍他縣。必籍貫實有可憑。方准改移。毋任其暗中賄買。僅查有前項情弊。即著照例懲辦。以端士習。

優貢優監事宜。○順治二年題准。直省府州縣

學。不拘廩增附生。將文行兼優者。大學起送二人。小學一人。入監肄業。名為貢監。○康熙二十四年議准。監生止有輸納一途。貧窶之士。無由觀光。將各儒學生員。選其文行兼優者。准作貢監。府學二名。其餘各學一名。起送赴監。如該學無文行兼優者。任缺毋濫。其試卷解部磨勘。察有冒濫。將考官糾察。○雍正十一年題准。各省優生。令該學政出具考語。具題送部。從前止議升入太學。並未分析貢監名色。以致一切考試錄用。皆無著落。今擬優生由廩增升入太學者。

准作優貢。由附生武生者准作監生。皆由部換給執照。劄監肄業。奉

旨。各省保送優生。廩增准作歲貢。附生准作監生。該部劄監肄業。其武生到部時。禮部考試文藝。兵部考試騎射。請旨。乾隆四年議准。嗣後舉保優生升入太學者。除確訪實行考試經義外。並限以大省無過五、六名。中省三、四名。小省一、二名。該學政詳慎舉報。如不得人。任缺毋濫。仍於任滿彙題到日。由部覈實具題。五年議准。選舉優生。除照舊例覈選外。亦必試以經義策問。擇其文理優

通者。始行舉報。如該省學政不能實心考選。濫貢成均。到部考試時。有文理荒疏。毫無實學者。本生及該學政照例議處。二十三年議准。嗣後保題之優生到部時。俟有四五名。本部奏請欽派大臣考試。分別等第進呈。其文理明通者。照例劄監肄業。荒疏者。發回原籍。並將該學政照例議處。又定各省考試拔貢。四書文經解策論外。加試五言八韻詩。

朝考拔貢。試以書藝一詩一。各省考試歲貢。亦改判為詩。以符體制。其優生保題到部。由部按照

先後隨時奏

聞除已經具題之優生。照補考拔貢例。試以書藝二篇外。嗣後保送者。均照拔貢

朝考之例。試以書藝一詩一。文理明通者。升入太學。荒疏者。發回原學。將學政議處。並令各省學政。豫於考試優生時。即兼試詩題。以昭畫一。

二十四年奏准。向例各省優生。俟到部。有四五名。始行考試。未免守候日久。嗣後優貢考試。照續到拔貢不拘人數之例。一體辦理。或遇有拔貢續到者。亦可一同考試。各分等第。○二十七

年議准。湖南鄉試錄取科舉。雖照大省例舉行。而南北分闈。取中額數。係屬小省。所有該省舉報優生。應照小省之例舉行。二十九年覆准。貴州學政條奏。拔貢年分。暫請停止。舉優貢一摺。據稱拔貢之年。中小省分。應拔者不下五六十人。極力掙索。尚多缺額。請將是年任滿舉優之例。暫行停止。查拔貢係十二年舉行一次。而學臣三年任滿。正宜舉優黜劣。以示勸懲。且所舉優生。通省不過數名。而又有任缺毋濫之例。原不致濫觴充數。該學政既稱黔省應考之人。

本屬無多。應聽其任缺毋濫。詳慎辦理。其餘省分。毋庸更改定例。○嘉慶十二年議准。臺灣府學及所屬四學生員報優者。由臺灣道造冊。送交福建學政。與內地各府優生一體會考。○十七年議准。黔省每逢拔貢之年。准其於任滿一體舉優。惟舉報優生。升入太學者。例當考試經義。兼須確訪實行。仍由該學政覈實辦理。毋得濫舉充數。○十八年議覆。順天向未舉報優生。與各省未能畫一。應由學臣行知各學。詳加查覈。得其人則酌量保題。不必以厯屆未舉。致令

向隅。如不得其人。任缺毋濫。至八旗生員。人文蔚起。優貢應一體舉行。如有文行兼優之士。准其另舉優生一名。如無人可舉。仍不得濫竽充數。○十九年

諭。禮部奏議。駁御史黃中傑條陳優貢考試事例一摺。各省優生。三年舉報一次。與拔貢十二年舉行一次者。年數懸殊。如一體加以廷試。引見錄用。實於體制未協。該御史所奏不可行。至該部奏稱。嗣後優貢生免其來京朝考。以示體恤等語。所議亦非。各省優生由學政會同督撫保題。升入太學。朝考後始准作貢。

生。斯合貢於王廷之義。若停止朝考。殊覺名實不符。禮部堂官輕改舊章。著傳旨申飭。其優貢朝考。仍照舊例行。○道光二年奏准。嗣後補考優生。各學政照例給咨赴部補考。如有在京取結呈請者。概不准行。○同治二年覆准。優貢一途。因無錄用之條。多未來京報考。嗣後量為變通。由各該學政覈實選舉。會同督撫保題。赴部驗到。定期奏考。通計各直省優貢不過六七十人。即在

保和殿考試。仿照順天鄉試卷面紅號之例。分印南卷北卷中卷字樣。以八旗奉天直隸山東山

西。河南。陝甘。為北卷。江蘇。江西。浙江。安徽。福建。湖北。湖南。為南卷。四川。廣東。廣西。雲南。貴州。為中卷。由閱卷大臣酌量多寡。比較錄取。其先後名次。仍歸併定擬。由禮部帶領引

見。考列一二等者。以知縣教職二項錄用。有不願以知縣候選者。從奉

旨之日起。扣足三年。隨時呈請分發。考列三等者。就經制復設訓導選用。定章之後。赴京投文驗到。統以次年五月為限。自來歲甲子科為始。○又

諭。官文奏湖南選舉優貢。懇照中省定額辦理一摺。湖

南省近歲以來。人才蔚起。講求實學。即如各路軍營。以諸生而委身戎馬。建立勳勞。推膺封疆將帥之任者。不一而足。庠序之中。經明行修。踐履克敦者。諒更不乏其人。加恩著照所請。湖南選舉優貢。准與湖北一律。按照中省四名定額舉行。即以同治三年甲子科為始。由該省學政會同該督撫覈實辦理。該督撫學政等。仍當慎選真才。考求素履。為國儲賢。以收實用。如或不得其人。仍當任缺毋濫。以體朝廷循名責實之意。現當破格求才之際。各直省於優貢一途。均當痛除向來虛冒積習。訪舉潛修積學之士。廣其登

進為國得人。以副殷望。○又

諭嗣後各省學政。於該省生員中。務當綜覈名實。認真考察。如有經明行修之士。該學政真知灼見。許其酌保數人。以為鄉里矜式。不准視為常例。濫行保奏。以杜倖進而重選舉。○四年奏准。嗣後考試優生。遵照定例。頭場試以四書文二篇。二場經解一篇。策一道。五言八韻詩一首。仍由學政會同督撫覆試驗看。其覆試題目。比照拔貢覆試之例。試以四書經文策各一篇。所有頭二場並覆試各卷。全行解部磨勘。並於卷面分註頭場二場覆試

字樣。毋致參差。○十三年覆准。分發各省人員。除舉人大挑知縣。拔貢分發知縣。未經委署地方。因告假回籍者。仍准鄉會試外。優貢呈請分發者。不在此例。○光緒二年覆准。陝甘二省優生。向照中省例考取四名。現在分省考試。應將原額劃分。各該學政各照小省例考取。陝西甘肅。均不得過一二名。不得其人。任缺毋濫。○七年奏准。嗣後優生

朝考。統限於會考次年五月內。赴京驗到。其呈報患病等項事故。及後期續到各生。隨時由部會

同國子監堂官奏請在部補考。如實因丁憂方准與下屆新生同應。

朝考。○又奏准拔貢補考。向由禮部國子監會同考試。文理明通者准作貢生。入監肄業。荒謬者斥革。疵累者發回原學。嗣後在部補考選拔生與優生補考者均遵照此例以歸畫一。

恩監事宜。○乾隆二年奏准八旗漢文官學生當使講求經史為有用之學。每三年一次奏請欽點大臣考試。優者拔作監生。與漢貢監等一體肄業。○六年議准八旗算學生俱與官學生一體

考試恩監。漢算學生。由生員舉人考取者。得應鄉會試。由童生考取。非順天籍貫者。無可應試。嗣後漢算學生。有通習經史者。一體准考恩監。○十年奏准。欽天監將肄業天文生二十四名。交與算學。附學肄業。一同教習功課。所有考試恩監事宜。照算學生一體辦理。○五十一年奏准。恭查

臨雍典禮。陪祀聖賢後裔。凡生員監生奉祀生。向均一體准作恩貢。無所區別。此次陪祀後裔內。復有武生俊秀。為向來所無。准其作為監生。至俊

秀原無頂戴。既係聖賢後裔。躬逢

盛典。在陪祀之列。亦請

恩准作為監生。○五十五年奏准。恩監生在貢院內考試。○嘉慶三年奏准。本年恭遇

臨雍觀禮後裔內有俊秀一人。比照陪祀之例。一體准作監生。○道光二十一年。國子監考試恩監生。閱卷大臣面奉

諭旨。進呈試卷面。黏貼黃籤。擬定名次。仍應於卷尾用墨筆填寫名次。以防卷有更換。○同治十年議准。由國子監算學生考取恩監生。在監當差。不克回

籍者。取具同鄉京官印結。呈請禮部。劄知原籍查照。○光緒六年議准。嗣後考試恩監生。仿照考試教習暨繙譯童試之例。先一日奏派閱卷。彈壓監試。按檢等官。次日黎明。將士子按檢點進。即於是日請領題目。送入貢院。敬謹刊刻。第三日黎明發給。各士子交卷。以日入為度。不准繼燭。俾截印卷面覈對坐號等事。得以從容辦理。

軍功貢監事宜。○順治十一年題准。隨征廩生。准作貢監。生員有軍功二等。准作監生。更有軍

功二等。准作貢生。此外有軍功作紀錄。雍正元年議准。八旗武職立功身故者。無論功績大小。官員給七品監生一人。護軍校。驍騎校。給八品監生一人。均於子弟內充補。乾隆四年奏准。八旗武職立功病故。所給監生。應按其立功之等第。以定監生之品級。嗣後出征立功未經議敘身故者。統兵將帥。將該員立功大小分別等第。造冊送部。係一等二等軍功。給該員子弟監生一人。食七品官俸。三等四等軍功。給該員子弟監生一人。食八品官俸。隨旗行走。遇有應

升之處。仍照例揀選。係五等軍功。給該員子弟監生一人。照捐納監生例。准其應試。

例貢例監事宜。○雍正七年議准。嗣後飭令各省。凡不應試之監生。於捐後行文取結時。即令其填寫不應試字樣。其應試監生。亦令地方官加具文結。查驗收考。○乾隆十年議准。文武生員。於歲考前捐監。經該州縣給發倉收者。俱准其免考。其未給倉收者。仍照例歲考。○二十三年議准。嗣後報捐貢監。令該督撫轉飭各地方官。務按名詳查煙戶冊籍造報。如有冒籍等弊。

即隨時咨部。不得因其已經上捐。朦朧註冊。致

滋假冒等弊。○三十一年議准。嗣後新舊捐納

貢監生。令該生呈明本州縣彙送督撫。造冊分

咨戶工二部。

由營田海塘江工等例捐納。應咨工部。

換與年貌三

代執照。凡生員加捐者。地方官接到部文。即行

報明學政。於學政冊內開除。○三十三年議准。

查過限未經換照之實收。既經戶部議令註銷。

其季報四柱冊內。應行刪除。此內有年老癯疾。

情願繳照不換者。照生員告給衣頂之例。於四

柱冊內註明緣由。下季毋庸造報。○三十六年

議准。捐納貢監不應試者。與農民一體選充社長社副。嗣後捐納貢監錄科應試者。由州縣起文。申送學政收考後。即將實在與考人數造冊。飭知該府州縣。以杜取巧避差之弊。○三十八年議准。嗣後大興宛平兩縣捐納貢監。及捐職人員。先令取具同鄉京官實係土著印結。黏呈戶部查覈。仍於收捐後。將所具印結。劄順天府飭交大興等縣備案存查。如有假冒情事。出結官照例議處。○四十五年覆准。監生志切正途。查無別故。准其辭監以原名就應童試。○四十

六年

諭據吳玉綸條奏甘省自三十九年以後報捐監生除填給空名詐稱實收應行查革者遵旨查辦外所有以折色報捐現奉恩旨免其斥革者每一名令其補繳銀六十兩以備甘省災賑撥用等語所見甚小王亶望等私收折色一案朕本意遲回甚不欲辦恐各省此後觀望諱災也今種種弊端水落石出伊等於光天化日之下竟敢明目張膽網利鬻官致朕不得不辦朕之苦衷天下後世共見之然侵冒各員已將伊等平日私收冒銷婪得贓私查抄入官亦足抵該

省浮開冒賑之數矣。若又令捐生紛紛補繳。轉開錙銖較利之端。於國家政體甚有關係。朕不為也。吳玉綸此奏不准行。至該生等明知折色違禁。乃相率報捐。亦不可不示懲儆。所有乾隆三十九年甘省開捐以後報捐監生者。停其鄉試三科。中式舉人者。停其會試三科。其加捐職官現任者。罰俸三年。捐納職官未經銓選者。俟到班三年後。方准銓選。其在各館充當謄錄者。著五年期滿後。再效力三年。俱以奉旨之日為始。查明扣算。其止捐監生頂戴榮身者。著加恩毋庸查辦。○又

諭前已降旨停止甘肅陝西兩省收捐監生。所有烏魯木齊新疆收捐監生著一併停止。又

諭甘肅收捐監生業經降旨停止。所有陝西省收捐監糧著一併停止。又議准甘肅捐納監生內有志應

試者。令各生將原照呈銷。以原名赴部報捐應試。勒限二年。如逾期不赴部改捐者。即作為頂戴榮身。其現充各館膳錄監生。有情願另捐者。亦准其於二年限內一體赴部報捐。再請將廩增附各生加捐甘肅監生。一體繳照重捐應試。其已經中式副貢人員。亦令在部補捐監生。方

准鄉試。至從前有甘省監生在部加捐貢生及職銜者。情願赴試。亦令於二年限內補捐部監。嗣後有甘省原捐監生加捐貢生及職銜者。令將原捐監生註銷。補捐部監。方准加捐。其未行補捐部監者。一概不准加捐。又

諭昨據副都御史汪承霈條奏甘肅省監生一摺。據稱自乾隆三十九年後。甘肅監生奉有停科之旨。恐其中躁進之徒。不安義命。更易名字。在部報捐。鄉試或僥幸中式。轉滋弊竇。與其再犯而懲以冒混之條。似不若先事而予以自新之路。請以原名在部另行改

捐。給予執照。免其停科。並請勒限二年報捐。如過期不捐。雖扣滿三科。亦不准其應試等語。此等流弊。事所必有。其所請在部另捐之處。專為杜絕頂冒。以防弊混。並非若吳玉綸之迹類言利者可比。是以交部詳議。覆准允行。蓋此等監生。逐利熱中。希圖省費。報捐。竟成壟斷。即概予褫革。原不為過。今照部議。統限二年。准以原名在部另捐。入場應試。已屬格外加恩。但念該生等人數衆多。從前在甘肅上捐時。俱係王宣望諸人引之犯法。非盡該生等之過。況前已出資。今概令重捐。其中寒賤。未免志切觀光。而力有不逮。

情殊可憫。著加恩將從前在甘肅報捐監生者。准其呈明到部。另照在部捐監之數繳足。即給予執照。許其科舉。至定限二年。為期稍近。恐遠省邊陲。一時未能徧曉。及至遵例遠來。而限期已過。未免向隅。著並加恩再寬限三年。統限五年為率。俾該生等從容報納。上進有階。以副朕宥過推恩作養人材之至意。

又

諭

戶部議奏。由甘肅報捐監生。及中式效力加捐出身各項人員。准其於五年限內。照例補捐部監一摺。著依議行。此等監生。在甘肅折銀報捐。雖皆牟利犯法。

之人俱因王亶望諸人引之犯法。然其壘斷熱中。以成均出身之路。竟視為終南捷徑。趨之若鶩。即概予褫革。亦不為過。前據吳玉綸奏。即降旨將甘肅監生出身人員。分別停科壓選罰俸。庶躁進之風。藉以稍息。此朕因人數衆多。不忍概行斥革。是以加恩薄示懲儆。實亦大公至正。所以維持士習也。嗣因汪承霈條奏。該監生等恐奉有停科之旨。仍有不安義命。更換名字。在部報捐。鄉試或儼幸中式。將原名頂替滋弊者。請於二年限內。准令在部另捐。朕以其所奏專為防弊起見。該生等希圖倖進。事所必有。與其冒混

被告。再加懲治。誠不若先事而量予自新。俾其弊不杜自絕。經部議准。降旨允行。尋思二年定限。為期稍近。邊陲寒暖。未免向隅。特再寬三年。統限五年為率。茲戶部議奏。由甘肅省報捐監生。及中式加捐效力人員。一例補捐。酌定銀數。自應如此辦理。朕於此案內之監生。始終宥過推恩。矜全格外。此次之准令在部補捐。實為杜絕弊混。予以自新。該生等有不願重捐者。自當仍遵前旨。若有易名作弊。一經發覺。必重治其罪。至頂戴榮身不圖仕進之人。前亦有旨毋庸議及。非若吳玉綸所奏。每名必令補繳銀數。專為言

利起見。將此再行通諭知之。欽此。遵

旨通行各省學政並國子監。自甲午科以後。由監生中式人員。逐一詳查。如原由甘省捐監中式未經遵例補繳銀兩換照。均不准其領咨會試。仍咨報禮部。其已經遵例補繳換照。及並非在甘省捐監者。亦於會試咨文內聲明報部。以憑查覈。至由甘省監生中式未經

殿試進士。並行文各該督撫查明辦理。再現在考充各館教習內。如有原係三十九年以後甘省監生。亦一律遵例補繳。方准應試。○四十七年

覆准。臺灣府倉暨各州縣冊報。現共存穀七十餘萬石。即內地漳泉等府屬倉儲。亦皆足額。正無藉收捐監生。始足以裕備儲。所有臺灣捐監之例。一併飭停。以昭畫一。○又議准。安西肅州二屬。自三十九年冬季後。報捐監生。前據該督清查。歸入甘省案內辦理。經戶部議令每名折銀四十五兩。仍補交銀六十三兩。作為京監等因在案。今安西肅州二屬。自三十七年起至三十九年秋季止。報捐監生。既據該督照甘肅折捐州縣之例。一律查辦。自應仍照前例辦理。應

於四十八年為始。亦定限五年一體補捐。以昭畫一。○五十二年奏准。在甘省捐納監生。自五十三年正月為始。至五十四年十二月為止。再行寬限二年。依限補納。儻屆期滿仍未補交。即照原議停止辦理。○五十三年奉

旨。現任官員丁憂者。尚應回籍守制。其報捐俊秀。既係服制未滿。何迫不及待。而必欲差人報捐。該部一併列入應准條內。未為允協。嗣後丁憂人等。俱不准其報捐。服滿後仍令本人親身赴部具呈。始可准行。○

又

論從前甘省報捐監生。因王亶望通同屬員。舞弊營私。致多事棍徒乘機代攬。遂有包捐情弊。今皆係在部報捐貢監。豈得復有代為包辦名目。貢監為士子進身之階。必得身家清白。方准廁列衣冠。該生等如有志向上。自應親身赴部。呈明履歷。候批准報捐。方為正理。若該生等因道遠盤費不敷。不能親身到部。即可毋庸報捐。國家帑藏充盈。又豈藉伊等些微捐項為耶。嗣後如有在部具呈請捐貢監者。該部應驗明年貌。實係親身赴部身家清白之人。始准報捐。若本人並未赴部。倩人代捐者。概行飭禁。以杜匪徒誑騙。

包攬情弊。○嘉慶八年覆准。監生准其兼襲恩騎尉世職。照例給予全俸。○九年奏准。湖廣之苗徭。廣東之黎崗。廣西之土官土目子弟。雲南威遠之彝人。四川之番民羌民等。向俱准應童試。如有情願捐監者。准其一體報捐。○十四年議准。註銷監生。仍以附生應試。與廩生食餼者不同。准其註銷監生。仍以附生應試。○十八年覆准。土司既經承襲。即係職官。不得再捐監生。○又覆准。由民壯改充縣役。所管督解遞犯承差詞訟。與阜快名異實同。其子孫不准捐納監生。○

二十年覆准。監生兼承小宗之祧。止應將兩祧之處。報官立案。照內毋庸補填兼祧父名。○又覆准。小宗獨子。承祧大宗。例應持服三年。所有原捐監生執照。向填本生父名。准其更承祧父名。以正宗派。○又覆准。捐納監生。並未到案出結造報。復改名重捐監生。加捐職銜。俱將三代更易者。係屬濫捐。一併斥革。○二十一年覆准。四川西昌縣土司所管之彝人。報捐監生。覈與雲南彝人准其報捐者無異。應飭該地方官並該土司。照例取具身家清白印甘各結送部。以

昭覈實。○二十二年覆准。附生告頂後。准其報捐貢生。不得再應鄉試。○二十三年覆准。農民承充號房。並非隸卒。改充。委無別項身家不清之處。准其報捐監生。○二十五年覆准。嗣後鄉試之年。俊秀貢監。充當順天府屬幕友。不及回籍起文。欲應順天鄉試者。由順天府造具貢監姓名籍貫三代。切實文結。聲明係何衙門申送。彙齊送監。該監仍取具同考五人互結收錄。其籍隸順天貢監。仍不准起游幕文書應試。○道光六年奏准。俊秀議敘六品銜。未便准應童試。

如果有志上進。准其補捐監生。就應鄉試。○九年覆准。江蘇海關杆丈手。並不由他役拔充。與安徽蕪湖關操練總。由巡役拔補者有聞。亦不承票拘犯行杖。准其一體報捐。嗣後杆丈手一項。必須身家清白。方准投充。如由他役拔補者。仍不得援以為例。○十年覆准。監生出繼歸宗。不准呈請換照。應將原捐各照繳銷。如情願另捐。准其聲明情節。另行報捐。○十七年議准。嗣後由俊秀捐納之貢監。有出繼歸宗。及名同遠祖者。由該地方官取具甘結印結報部。准其繳

照另捐。其有無力再捐者。毋庸追照。准其頂戴榮身。由國子監戶部註冊立案。飭令該生不得將原捐之照報捐應試。以杜弊混。○十九年議准。報捐貢監。誤填履歷。或三代。或本名。音同字異。偏旁錯誤等項。實係託親代捐者。近省限六月。遠省限一年。更正換照。○二十三年議准。俊秀既准報捐武監。廩增附青衣生等。如有願棄文就武者。准其報捐武監生。應武鄉試。仍於執照內註明應武鄉試。不准再應文闈鄉試字樣。以杜文武跨考之弊。○又覆准。報捐應武鄉試。

各生應先期造具年貌冊結呈送學政衙門收考。俟取錄後該學政造具名冊咨送順天府。准其一體鄉試。並造冊送部查覈。○又覆准。八旗滿蒙漢報捐各生。有願應武鄉試者。由各本旗參佐領等造具年貌冊結呈送錄科。以昭畫一。○又覆准。各省報捐武監生。不准與考順天鄉試。與文場貢監准應南北鄉試者不同。未便照文場不能回籍起文。取同鄉京官印結辦理。○二十五年覆准。舊例直省報捐監生。於給發實收之日起。扣限五年內。赴部換照。定限既寬。奉

行轉解。嗣後均照戶部新定換照期限。近省在一年之內。遠省在十五月之內。如在未換照限內。適逢鄉試。仍照乾隆九年議准之案。准持實收考錄科舉。如逾限期。驗明執照。方准收考。不准僅執實收錄科。報捐貢生。武監生。均照此辦理。○二十六年覆准。附生考取天文生。開除學冊。仍應准其捐考。○二十八年議准。捐納職官。奉

旨作為貢生監生人員。如有願應鄉試。應補領部監執照。以便錄科查驗。予限一年。如在一年內。遇

錄科時。即將官照呈驗。一年限外。即應呈驗部
監執照。以歸畫一。應本省鄉試。均照此辦理。
咸豐四年覆准。生員緣事斥革。案擬笞杖以下。
情節較輕。准其捐監。另捐官職。若罪已擬徒。情
節過重。不准其加倍報捐。○五年

諭。禮部奏查議湖北巡撫胡林翼奏請監生准充牙行
一摺。生監例不准開設牙埠。胡林翼所奏。自因接濟
軍需起見。惟生監既充牙行。若准其應試。漫無限制。
與例不符。著照部議。所有捐充牙行之生監。均不准
復行考試。如有情願報考者。先將牙帖呈明地方官

註銷。咨部查覈。俟軍務告竣。生監仍不准續行捐充。以符定例。○八年覆准。俊秀已捐監生。情願童試。必呈明註銷監生。方准應試。如違例考取。應仍留監生。將附生註銷。以杜弊混。○又議准。俊秀捐納監生。改籍後止准頂戴榮身。不准應試。○同治二年奏准。嗣後捐納貢監。仍遵乾隆年間定制。責成州縣官約束稽察。遇有與生員同案滋事者。會同教官辦理。如犯細事。應戒飭者。仍會同教官面行扑責。其餘事件。教官不得干預。貢監如有作姦犯科之事。不行舉發者。惟州縣官

是問。以專責成。○六年議准。貢生旗扁銀兩。惟恩歲兩貢。照例分給。拔貢副貢優貢三項。例內雖無明文。惟均係正途。自應援歲貢之例。聽其自行豎立旗扁。至捐貢一項。雖列成均。與臨場取中有間。應示區別。除從前已經自置旗扁免其拆毀外。嗣後捐貢。不准與恩拔副歲優五項自置旗扁。○十三年議准。已捐隨官監生。向令補交四成實銀。凡由俊秀報捐貢監。欲應鄉試者。除舊例十成銀數報捐外。自同治十三年起。其由減成報捐之貢監生。統令補交監生四成。

實銀。方准應試。武監生應試。均一律補交。國子監及各省學政。於錄送科舉。及錄遺時。捐生呈驗。四成實銀執照。再行收考。至廩增附在本省例。准鄉試。其報捐貢監生。無論原捐是否減成。毋庸補交。其在十三年以前。由俊秀減成報捐貢監。仍准應試。均毋庸補交。免致紛擾。○光緒九年奏准。定例年老諸生。有由俊秀捐監者。查明報捐在十科以前。曾經鄉試者。如三場完竣。照生員例一體。

恩施。嗣後年老例貢監生。應試錄科。即照年老生員。

例。大學用廩生六名。小學五名。公同具保。其廩額不及五名之學。准取具增附生識認甘結。呈州縣官驗明執照。覈其年貌相符。加具查無頂替印結。申送考試。國子監及學政查驗執照。年貌無訛。始准收考。如有頂冒情弊。一經發覺。除將頂冒及借給執照之人治罪外。並將出結之生員等斥革。知情受賄者。分別治罪。不行詳查之起送地方官。暨收考官。均交部議處。其非年老之例貢監應試。仍照例取具同考生互結。由州縣起文申送。如有依親覓館。隨任讀書。回籍

較遠不及回本州縣起文者。准由幕所任所正印官。出具並無頂名冒替印結。申詳督撫轉送本省應試。照舊辦理。至鄉試奏請年老例貢監恩賞時。即將該貢監原捐各照送部查覈。俟奏准後。該貢監既經

賞給舉人副榜。原捐執照無須發還。由部分送國子監戶部查銷。其由貢監中式者。原捐各照填寫親供時。將執照呈繳學政。副榜呈由地方官。申詳督撫。均送部分別查銷。並由各該督撫通飭各該地方官。徧行曉諭。凡已故捐納貢監。有原

捐執照。均令隨時繳銷。以杜蒙混而清流弊。至
文武互試之例。久經停止。凡由武生捐監者。止
准應文鄉試。不准更入武闈。其捐納武監生。概
不准應文闈鄉試。

欽定大清會典事例卷三百八十六

禮部

學校童試事宜

童試事宜。○順治九年題准童生入學。乃進身之始。督學文到。先期曉諭報名。取鄰里甘結。身家無刑喪替冒各項違礙。方准收試。每府各州縣開會一日同考。府試亦彙齊一日。以防重冒。務照入學定例名數。縣考取二倍。府考取一倍。府考取錄已定。冊報名數。榜示童生。照所取次序。五人為一結。取行優廩生親筆花押保結。查

照格眼冊式。當堂令各童生親填年貌籍貫三代經書。彙為一冊。並各結狀黏送。其點名冊仍書年貌不對者。不准收考。每名仍開保結廩生姓名於下。點名時廩生與同結五人互相覺察。如有倩代等弊。即時舉出。容隱者五人連坐。廩生黜革。其府州縣原取之卷。合釘封存。候發落覈對。其黜退生員。如不係行劣者。提調官准與童生一體收考。至於寄學改回。及稱游學隨任等事。別送者。悉不准行。入府學者。即於各州縣內量撥。不必另送。發案日再行覆試。筆迹雖同。

而文理不通者亦不准入學。詐冒籍貫投充入學。及詭寫兩名隨處告考。或假捏士大夫子弟。希圖徼幸。或係優倡隸卒之家。及曾經犯罪。問革變易姓名等弊。訪出嚴行究革。若教官納賄容隱。生員扶同保結。一體治罪。至冒名頂替換卷代筆之徒。倍加嚴察重治。○康熙三十九年。議准州縣府考取童生。不必限數。照常考送。如荒謬不通。故意蒙混。由學臣覈叅。其縣府兩試卷。一併解送學政三連對驗筆迹。○雍正元年。議准童生考試。由州縣送府。由府送學政。各加

印結。方准考取生員。行令各督撫學政實心奉行。嚴飭廩生。不許擅保品行不端之士。○又覆准嗣後歲科兩試。學政務將未取之卷批出不取緣由。交與教官。令該各童領去閱看。三年議准。歲科兩試覆試童生。令其默寫。

聖諭廣訓一條。○九年議准。武童考試外場時。每人供單一紙。各令親書籍貫三代年貌。俟取進時。再令復寫親供。嚴加驗對。以絕內外場調換之弊。至考試內場。將好字號武童。與合式字號武童分坐。以防臨時代倩之弊。著為定例。○十一年

議准府州縣考試童生。原有點名定例。嗣後府州縣有徇情濫縱。不肯點名。及地方豪紳劣衿。有倡縱鬧場之處。該學政訪聞。即會同該督撫指名題參。至童生院考。該學政嚴察保廩。如有假冒槍手等情。即將保廩照例斥革究治。○十三年議准。嗣後凡府州縣考試文武童生。即照學政衙門考試之例。令本籍廩生一體保結。仍於點名散卷時認識。儻有冒頂等弊。將該廩保照例黜革治罪。若府州縣官違例。不令廩保認識。混行錄送者。經學臣糾參。照混行收考例議

處。又槍手代倩。為學政之大弊。嗣後凡有代筆之槍手。照誑騙舉監生員人等財物。指稱買求中式例。枷號三月。發煙瘴地方充軍。其雇倩代筆之人。照舉監生員。夾浼營幹買求中式例。發煙瘴地方充軍。知情保結之廩生。照知情不首例。杖一百。再槍手之弊。多由包攬之徒。隨棚窩藏射利。嗣後如有包攬之人。與槍手同罪。其窩留之家。不知情者。照不應重律治罪。如有別情。從重科斷。其有入己贓銀者。計贓以枉法從重論。如有仍前革率完結者。該督撫即行查叅。將

該學政提調官。分別嚴加議處。○乾隆三年議
准。嗣後廩生保結童生。除實係頂名冒籍。毋容
濫保外。其所認識應保之童。毋許勒索規禮。○
八年議准。應試童生。有一人詭捏數名。及借頂
他人姓名入場。其有干槍手冒籍諸弊者。審實
自應依槍手冒籍定例從重問擬。其但係詭捏
數名。連棚應試及頂借他人姓名。假冒入場。希
圖倖進者。照詐冒例杖八十。保結之廩生。知情
同罪。○又議准。府試童生錄取之數。向無定額。
惟就其文風之高下。酌量錄送。嗣後文童入額。

一名。府取五十名。有濫送者。照數截去。至武童入額一名。府取二十名。如逾數。亦照文童例裁去。○九年

諭。向來州縣考取童生。送學政衙門考試。例有定額。後因儒童日益衆多。於康熙三十九年定例。不必限定額數。遵行在案。今年禮部奏請照每學入學額數。限定錄送之多寡。以杜冒濫。朕已降旨允行。今思各處赴試童生多寡不等。若限以錄送數目。恐有浮多於額外而擯棄不取者。即有不足於額中而強取充數者。未必俱能允當。況該府州縣錄送學政衙門。其去

取全在學政。並無關於入泮之數。應稍寬其途。以鼓舞之。亦廣育人材之道。嗣後仍照舊例。不必限定考送之額數。但將文理不通者。擯棄不錄。可即傳諭該部。將此旨通行各省知之。○又議准。嗣後府州考試童生。照州縣錄送名數。即在學政衙門考棚內編號。局試。如學政衙門不在府州治內。令該府州選擇就近緊密公所。照依院試之例。編列坐號。嚴行考校。仍按名取具廩生結保。並臨時識認。儻有不按本號混行雜處者。即行逐出。○十

年

諭。冒籍頂名。例有嚴禁。况歲科考試為士子進身之始。尤宜加意清釐。以肅學政。今江蘇地方童生應試。率皆彼此通融互考。且有一人冒考數處。或多作重卷數名。以為院試時售賣之地者。此種弊端。所關士習匪淺。朕思各府州縣皆有煙戶冊籍。難以蒙混。誠於州縣考試之時。童生報名。查對煙戶。無訛方許廩保填結。府考院考。俱令原保廩生識認。則冒籍頂名之弊可除。著該督撫轉飭所屬實力奉行。不得視為故事。該學政亦不時稽查。如有仍蹈前轍者。查明按律究治。○又議准。嗣後學政案臨各府。於考試招覆之

日。提調官即對明坐號姓名。將府縣原取本卷。解送學政。與所取之卷。逐一磨對。如文氣筆迹可疑。即行究治。○十一年議准。嗣後州縣考試童生。務須詳查煙戶冊籍。令廩生於點名時當堂識認。果無假捏。始准收試。仍於考試後十日內。將所取童生等履歷煙戶住址。及保結廩生一併造冊。出具並無重考印結。申送該府查覈覆考。俟學臣蒞臨申送。儘該州縣所取童生。有並無廩保。及不查明履歷。止填姓名送府。以致仍有捏名重考諸弊。該提調官查出。即行揭參。

如提調不行查揭。經該學政查出。將該提調一併題叅。○又議准童生考試。有不用本名本姓。假捏入學者。查出。本童斥革治罪。仍將保結廩生一併斥革。○十四年議准府州縣官錄送童生。人數過多。難於稽查。嗣後州縣考試童生。正考之外。不准一人補考。及頭場文字雷同。顯係重卷。並文理不通者。均宜擯棄。如任意濫送。該府州考試時。查出雷同及不通卷。至百本以上。將該州縣照混行收考例。揭叅議處。多者從重。察議。如該府州校閱不慎。徇隱州縣。濫送學政。

考試亦照此例查叅議處。如府州縣去取公當。而生童內有挾私妄控者。將生員斥革。童生不准入場。○十七年議准。向來府州縣考試童生。並不按名給卷。憑文取錄。惟聽吏胥多收重卷。為斂錢之具。以致重卷至三四倍五六倍之多。嗣後該學政嚴飭各府州縣考試時。責成廩保舉首。如廩保不舉。查出頂冒。將認保之廩生褫革究處。若重卷至數十名數百名之外。該學政會同督撫題叅。○二十三年議准。學臣考試童生。務將一縣合為一場。不得分場疊考。其兩縣

同城者。兩縣合為一場。以杜重冒之弊。如果人多棚狹。必須增添號舍者。由該學政會同該督撫酌量辦理。○又

諭。小考即士子始進之階。鄉會試甄拔進士舉人。初不出院考。所取童生之內。使府縣送考人數過濫。學政看卷亦易為所混淆。嗣後各直省府縣考試。毋得濫行收錄。俱著酌量按照地方人數。覈實取錄。以昭慎重。其臨試時。並著遵照條例。嚴立關防。審擇考校。從此陋習可除。而各該學政亦得從容閱卷。不致有魚目混珠之弊。其於學校甚為有益。著將此通行曉諭。

知之○二十六年議准各省直隸廳州本轄童生考
後直送院試如知府與知縣各管地方及與同
知通判分管地方而無州縣者其縣試調委同
知通判分管地方之知縣辦理○二十七年議
准童生考試例由縣考後始送府試府考後彙
送學政如不由府州縣正考直至學政考棚捏
稱患病游學名色呈請補考者概不准收考至
考試首嚴匿喪若童生於府縣考之時未經服
闋即係不應考試之人概不得於學政案臨時
補送○二十九年

諭學政李綬奏考試童生多有冊內年歲甚幼而其人實已至四五十歲不等者。現發提調查辦等語。剔弊可謂認真。但此等情弊恐各省所在不免。易為槍手頂冒。潛行假託。甚有關係。著傳諭各省學政於點名之時。留心詳慎體察。務期弊竇剔除。毋少疏忽。又議准。向來府州縣考試廩生多不到案。有名無實。嗣後府州縣考前。教官先將廩生豫造一冊。申送府州縣。於點名時。將廩生親到與否填註冊內。申學臣查覈。至府州縣考畢。將已取名冊發學。即將某廩認保某童造冊。亦申學臣查覈。

○三十一年議准童生年歲不符。州縣考試以及府試時。例應逐為查禁。至院考點名時。學政查其年貌大異。或有冒名頂替之弊。即當嚴為究擬。如考試實係本人。所開年歲稍有短少不符。雖無關弊實。亦應改填確實。示以無欺。嗣後考試童生。務嚴飭廩保等查明各童生實在年歲填註。毋得浮開。○三十二年議准。嗣後各府考試事畢。揭案之後。提調官於一二日內。將錄取童生姓名人數造冊封固。鈐用提調印信。一併申送學政衙門存儲。學政不得豫先拆看。至

試日點名時。將封固姓名名冊取出。公同驗封拆開。同臨期所送點名清冊。一併稽查覈對。如考試點名時。有竄易姓名。與前造送之冊不符。及增添人數者。即時查出。指交提調官究處。點名事畢。即將所送名冊。照點名冊之例。眼同封固。發交提調官領出收存。以便出案時稽查。至府州縣考試。原不許濫行錄送。如仍視為具文。將不能完卷之人。濫行錄送者。該學政會同督撫照例叅處。○又議准嗣後各省府州縣試。不得委令教官閱卷。違者。該督撫學政查叅議處。

○又議准嗣後各府州縣考試不得延請本地書院院長及他省流寓之人閱卷。違者查叅議處。○四十二年議准嗣後考試大興宛平二縣童生其審音之漢御史籍隸南省者毋庸開列。○四十三年覆准監生呈請註銷以原名就應童試查明並無別故即予註銷監生以原名應試。○五十五年議准各學派保責令各教官遵例挨派毋任童生私自識認挨保之後學政仍不時加意周防毋致童生賄囑派保致滋弊端至傳遞一節嗣後由該管學政親自督同提調

及巡捕各官。內外上下巡查。並將書辦衙役。於未經出題之先。概行封鎖。其弊自絕。○五十七年

諭。前據戈源奏。請嚴定縣府考送童生額數一摺。交該部覈議具奏。並令長麟將山西省考試童生。是否可定額數之處。酌議覆奏。並據長麟奏稱。縣府考試。弊竇最多。往往閱卷衡文。委之幕友。本官並不寓目。甚有瞻徇情面。及任聽幕友書役。勾通舞弊等事。應請嗣後縣府考試。毋庸定額。俟錄送學臣考試。如所送童生。實在荒謬不通。即由學臣咨送撫臣查覈卷數。

多寡。將原送官查取職名。咨部分別議處等語。各省縣府考試。每以錄取入學。總憑學臣定奪。遂視為無關輕重。本官概委幕友閱看。或有意沽名。將文理荒謬之卷。濫行錄送。其或瞻徇情面。聽受賄囑。並任幕友書吏勾串交結。種種弊端。皆所不免。亦不獨山西一省為然。今長麟請定處分。俾縣府各顧考成。不敢仍前弊混。所奏尚屬可行。著交大學士九卿會同該部。一併悉心妥議。欽此。遵

旨議定。嗣後府州縣考試童生。除查係徇情賄囑。並任聽幕友書吏勾通舞弊等事。另行據實嚴參外。

其有將文理荒謬之卷。任意錄送至五十本以上者。聽該學政咨送該督撫查覈屬實。將原送之州縣照混行收考例議處。其濫送之府州。一併照例分別議處。至府縣延請代為閱卷之人。儻有勾通舞弊等事。自應查究治罪。如止係限於才識校閱未盡允當。無關弊竇。免其置議。儻延請不得其人。即將濫送之該府縣照例議處。○嘉慶六年議准。廣東省東莞縣客籍童生。照衛學苗學之例。每逢考試。自相互結。俟有取進之生員。即令自相認保。○八年覆准。江西省萬

載縣棚童應試已有數百之多。廩生僅止一人。認識難周。照廣東省東莞新甯二縣之例。令棚籍增附各生一體出具保結。識認俟將來棚籍廩生新增。仍歸廩生專保。○十二年覆准則例內載直省府州縣

文廟額設樂舞生。由本籍俊秀選取。每遇考試。免其府縣考。與諸童一體院試等語。其由俊秀承充奉祀生者。即比照俊秀挑取樂舞生之例。免其府縣考。俟學政案臨時。與諸童一體赴院應試。○又議准民人寄籍順天。初屆二十年入籍者。

照例自行呈明。由順天府確查合例。報部立案。方准收考。嗣後歲考用廩保八名。科考用廩保六名。其寄籍補廩者。查明入籍已久。方准派充。仍於每次考試時。令該廩保各出具並無童生冒籍甘結。由教官查覈加結。申送府丞學政衙門。於審音時。仍令詳加查覈。如有假冒。即行嚴參。該管官不實力稽查。照例議處。○十六年奏准。取進童生患病不能覆試者。應行扣除。以杜規避。若取進後適值丁憂。俟服闋後。由提調申請補覆。其有匿喪冒考。捏稱考後丁憂者。仍照

例治以應得之罪。二十年

諭御史孫升長奏順天府考試童生。聞有不肖廩保。串通學書門斗。設立私局。包攬頂替。槍代等弊。請查拏嚴辦等語。著交順天學政飭屬嚴察。如有前項情弊。立即嚴拏。究明實據。將廩保從重懲處。以肅考試。又覆准。民壯例得捐考。如係承緝案件。總催錢糧。與糧差。早快無異。其子孫不准考試。二十一年覆准。

恩旨賞給九品職銜人員。並非貢監出身。仍令就應童試。二十二年奏准。嗣後習教犯案。罪在徒

流以上者。查明子孫實未入教。以本犯之子為始。三輩後所生子孫。始准考試。仍先呈明地方官。取結咨部查覈。○二十四年

諭慶保等奏。知府考試出榜後。任意顛倒。請旨解任。查訊一摺。考試既經發榜。豈容任意更易。陸溥於武昌府府試。將咸甯縣原取第一名之樊棟。與原取之第十名之黃道成。互易名次。無怪物議。譁然。陸溥著即革職。交慶保張映漢提集案內人證。嚴審確情。定擬具奏。○又覆准民快之子。雖經出繼。仍不准考試。○

二十五年。覆准江西贛南道衙門舍差。專司關

餉。並無拘犯行杖之事。原擇身家清白之人承充。嗣後准其捐考。○又奉

旨。步軍統領衙門番役。向由清白良民充當。嗣因御史條奏。番役子孫不准考試出仕。經吏禮二部議准。惟思該番役內。現有身任守備等官。其子孫何以獨不准應考出仕。嗣後番役子孫。著准其應試武場。出仕武職。仍不准由文途考試出仕。以示限制。○道光元年

諭。吳其彥奏。查出冒名代考。據實檢舉一摺。邵潼以大興縣生員。為蒙古文童柏齡冒考取進。大千功令。邵

潼柏齡著交刑部審明。按律治罪。吳其彥自行查出
檢舉。其所請交部議處。著加恩改為察議。由旗派出
之識認送考各員。著該部於定案時照例叅處。○四
年

諭。蔣攸銑奏查明承種蒙古地畝各戶恃符拖欠。請酌
定章程以懲刁劣等語。所議甚是。直隸口外承德府
並所屬各州縣蒙古地畝。向係外省流民寄居承種。
該民人等因年久入籍考試。往往恃符逞強。並有外
省外府潛赴口外。頂冒應試者。一經獲售。即入籍該
處。聯為一氣。以致應納糧租。歷年拖欠。迨地方官訊

追又任意抗延。不可不嚴行整飭。嗣後凡承種蒙古地畝。如有拖欠糧租。在官告追未結者。本人及子孫不准應試。每屆考試之年。責成各該地方官豫期詳明順天學政。並直隸總督衙門查覈。俟糧租完清後。仍准照舊赴考。如有假捏改名頂冒等弊。責成教官隨時查察。據實詳辦。儻教官與廩保生員徇隱不舉。即行照例叅革嚴懲。○又議定考試文童。額設派保以重稽查。儻派保臨場告假。該學政當飭另換派保。以杜藉詞推諉之弊。○又議准童生覆試。照正場之例。黎明點名。申刻淨場。不准繼燭。如

該童臨點不到。即行扣除。若係該教官需索留難。以致遲延。亦即叅處。又覆准。安徽省長准衛糧差。係輪派催糧。並不兼充他役。亦非支領工食。與湖南省專設糧差不同。其子孫仍准其捐考。又覆准。廚行一項。除本身不准捐考外。酌照捆工及在官轎夫之例。於報官止業後。扣滿十年。子孫方准捐考。退業後復蒙混承充。即將捐考之人。一併斥革。至本係家奴充當廚役者。仍照例不准捐考。○六年

諭。御史黃德濂奏。直省學政覆試新進童生。請仍照舊。

辦理一摺。各省新進童生覆試。舊例先期赴學填冊
畫保。原以杜槍冒及身家不清等弊。嗣經禮部奏准
新生覆試。改由提調造冊申送。該提調管轄既多。公
事亦繁。於各童生有無槍冒及身家清白與否。不能
如教官切近周知。必致蒙混滋多。教官轉得卸責。且
書役門丁串通勒索印卷冊費。較各學斗書。其弊尤
甚。本年為各省舉行歲試之時。所有覆試取進童生
著各省學政仍照舊例辦理。定於正場出案之日。飭
令該學教官。將取進童生三代年貌籍貫清冊。與覆
試印卷。即日併送學政衙門。聽候覆試。不得藉端遲

延並仿照正場之例。黎明點名。申刻完場。不准繼燭。其無故不到者。該學政查係該童遲誤。方准扣除。若係教官與書斗等需索留難。即行嚴叅懲辦。總在各該學政認真稽察。毋稍瞻徇。則積弊自可肅清。不在更張成例也。○又

諭。福申奏考試文童。有以該童生親父胞兄作為認保廩生者。請飭各省一體嚴禁一摺。向來各省童生應試。例有認保派保廩生。互相糾察。原以防槍倩匿喪等弊。若如該學政所奏。江西省相沿舊習。有以該童生親父胞兄作為認保廩生者。縱有情弊。豈能責令

攻舉。江西如此。他省恐亦不免殊於立法之意未協。著各省學政通飭該省各府州縣。凡有前項情事者。悉令於府州縣考試時嚴行禁止。以清弊竇而肅科條。○七年議定。民間收生婦女。地方官概不准勒派驗姦。果無別項身家不清。其子孫應准其捐考。如係承差服役。傳驗姦情。迹類忤作。以報官改業之人為始。下逮四世。查係身家清白。方准捐考。○又

諭。前因英和面奏。步軍統領衙門番役緝捕得力。曾經降旨。凡番役子孫。准其應試武場。出仕武職。仍不准

由文途考試出仕。以示限制。茲據御史沈魏皆奏。番役入仕。及番役子孫應試。請仍改歸舊制等語。番役專司緝捕。原與各項執役人等無異。從前嘉慶年間節經欽奉

皇考仁宗睿皇帝諭旨。番役中得過頂戴者。止准暫留頂戴。不准實缺補用。其子孫不准選用官職。此後亦不准再行應考等因。仰見我

皇考澄敘官方慎重名器之至意。該番役投充之初。原不問其身家清白與否。一經准其出仕。則凡身家不清者。或藉此為進身之階。不可不防其漸。此等人役

畀以戎行重任。既非素習操防。亦復難資表率。嗣後番役等除著有勞績。特旨獎賞錄用外。該番役及其子孫。均不准其應試武場。出任武職。以符舊制。而清流品。○又覆准。江蘇徐州道衙門直堂吏一項。均係召募清白農民。自備資斧。專辦河工事件。並不勾攝公事。嗣後准其捐考。○九年覆准。民人刑傷過犯。例不准考。如因伊父犯案患病。求代受責。愛親情迫。出於至誠者。准其捐考。○十一年諭。御史徐培深奏。考試大興宛平二縣文章。請嚴禁槍替一摺。學政歲科兩試。錄取文章。原期遴拔真才。以

端始進。若如該御史所奏。順天大興宛平二縣。間有本童毫無學業。雇倩能文之人。自縣試府試。以至院試。覆試皆係一人頂替。而本童則潛匿家中。坐候衣頂。並有廩保受其賄囑。代為容隱。以致弊竇滋生。實屬大干法紀。該二縣有此槍替之弊。恐各處皆所不免。著通諭各省學政。認真稽查。責成各廩生。務須查明赴考之人。實係本童正身。方准具保。如有頂替情弊。將該槍手嚴行究辦。其具保之廩生。一併重懲。以杜弊端。而正士習。○十三年覆准。江蘇省許關渡夫。係搖載書役巡稅。即與在官人役無異。照在官

轎夫之例。不准捐考。○十七年覆准。湖北省荆
州關書差。專司錢糧書算稅單。稽查偷漏。即係
該關巡役。其子孫不准捐考。○十九年覆准。良
民充當船頭繙夫。本非卑汙賤役。向無額設卯
簿。嗣後准其捐考。○又覆准。戶部庫丁。自屬賤
役。不准捐考。其子孫照小馬隸卒之例辦理。○
二十五年覆准。承催衛糧民糧。名為糧長。其子
孫准其捐考。如由賤役改充。及兼充賤役者。仍
不准藉糧長名目。蒙混捐考。○又議准。俊秀議
敘七八品銜者。應令補捐監生。改應鄉試。不得

再應童試。○二十八年覆准民人曾充軍牢。雖無卯簿結狀可稽。究係賤役。以報官改業之人為始。下逮四世。清白自守。方准報捐應試。○咸豐三年議定。已革莊園頭子孫。令將原欠錢糧數目。罰交三成。後准其報考。其本身被革。及此次奏准後。欠糧被革人等子孫。仍不准援請報考。以示限制。○十一年議准。嗣後各直省學政。遇考試時。務須秉公校閱。其僧生文理明通者。一體取充附生。如本非佳卷。不得因卷面填寫僧生。從寬取錄。○同治四年議准。應試童生身

家不清。變易名色。隱匿冒考。責成廩保於縣考時先期確查。出具識認保結。如一時未經覺察。准其自行檢舉。僮扶同隱匿。經該處童生訐告。訊實。照例治罪。該處生童止准於縣府考及學政按試之先。指名稟究。概不得臨場呈控。如有扶嫌誣告者。治以應得之罪。○五年覆准保舉實職在籍候選人員。不論品級。概不准再應童試。○六年覆准武生情願註銷武生。應考文童。經兵部覈准後。比照註銷貢監之例。報考文童。

○七年

諭。湖北學政張之洞奏府州縣試錄送過濫。請申明舊例以定限制等語。向來府州縣錄送文童。荒謬不通。至五十卷以上者。叅處立法本嚴。自軍興以來。被兵省分。士子播遷流離。備嘗艱苦。是以於考試時。每寬其科條。廣其登進。藉以培養士氣。茲據該學政所奏。近來府州縣積習相沿。於考試文童。全行錄送。並不遺漏一人。以致院試時。每有塗寫雜字。並鈔寫他題成文。以及槍冒傳遞懷挾等弊。曾見疊出。於士習文風。大有關係。此等惡習。他省諒亦不免。著各該學政嚴飭各府州縣。遇考試文童時。查照舊例認真刪汰。

錄送不得過濫。並嚴禁搭冊等弊。其有藉考試為名。希圖滋事。聚衆擾害者。著地方官嚴拏懲辦。以正士習而絕弊端。○十二年覆准。直隸省鋪司鋪兵。其子孫例准應試。鑼夫執業賤役。與吹手相等。子孫不准考試。如充當鋪司。後復兼充鑼夫等項賤役者。其子孫概不准復行應試。○光緒元年覆准。屠戶一項。執業近於殘忍。未便遽列士林。俟報官改業後。准其捐考。○二年覆准。民人曾為早役養子。後歸本宗。未便令其捐考。如本宗實係身家清白。其子孫准其報捐考試。○又議准。

嗣後童試冊結務填祖父真名。有功名者必須註明。出繼兼寫本生三代。府州縣試原卷合釘封存。以防抽換。屆時送提調官。於取進後覆試磨對。不合者扣除。如有雇槍頂名。蒙取轉賣等弊。問實。比照指稱買官求中式等項誑騙之例。分別已成未成科斷。至身家不清。刑喪歧冒。廩保通同容隱。控實。照例嚴懲。凡攻訐一切違礙。止許文武生童呈控。此外一概不准。榜發日久呈控不准。府州縣試前列二十名。院試榜前不先呈控者。不准。儻因索詐未遂。到堂攪擾。照事

不干己。健訟圖詐之條治罪。如呈控非虛。府州縣及提調照徇。底降三級調用。例議處。槍手廩保文童事發後。能將包攬之人供出。指引捕獲。准予免罪。認保廩生舞弊。咨部黜革。由地方官訊明所犯輕重定擬。即無重情。其濫保亦永遠不准開復。○三年

諭。廣東學政吳寶恕奏廣東考試槍冒甚多。各屬廩保並不遵例挨派。不肖廩保朋比為姦。槍手遂肆行無忌等語。所陳考試情弊。恐不獨廣東省為然。著各省學政嚴密稽查。認真整頓。以肅學校而端

士習。○七年議准。嗣後雲騎尉恩騎尉世職人員。本由文生員兼襲者。准其一體應試。其由俊秀承襲者。無論是否學習期滿。概不准其應試。如有未諳弓馬。願應文試者。止准以本職頂戴。作為文生員一體鄉試。不准歧考。童試責成廩保詳查。不得含混保送。違者將所進文生註銷。○又議准。嗣後童試冊結。如有出繼等情。務將嗣父及本生父一併填註。其以大宗兼祧小宗。與小宗兼祧小宗。本生在前。小宗承祧大宗。大宗在前。將承祧暨兼祧兩房。並行開列。所填三代。

仍照例一律書名